



NEGERI KEDAH DARUL AMAN

ENAKMEN 10

ENAKMEN MUFTI DAN FATWA (KEDAH DARUL AMAN) 2008

Mengandungi pindaan terkini - K.P.U 30/2008

BAHAGIAN I – PERMULAAN

- Seksyen 1. [Tajuk ringkas dan mula berkuat kuasa](#)
- Seksyen 2. [Tafsiran](#)
- Seksyen 3. [Memelihara hak Kebawah Duli Yang Maha Mulia Sultan](#)

BAHAGIAN II – MUFTI

- Seksyen 4. [Mufti](#)
- Seksyen 5. [Perlantikan Mufti dan Timbalan Mufti](#)
- Seksyen 6. [Penamatan dan pembatalan perlantikan Mufti dan Timbalan Mufti](#)
- Seksyen 7. [Fungsi Mufti](#)
- Seksyen 8. [Kuasa Mufti](#)
- Seksyen 9. [Permohonan izin jika Mufti berada di luar Malaysia](#)

BAHAGIAN III - JAWATANKUASA FATWA

- Seksyen 10. [Jawatankuasa Fatwa](#)
- Seksyen 11. [Keahlian Jawatankuasa Fatwa](#)
- Seksyen 12. [Notis jika Ahli Jawatankuasa Fatwa berada di luar Malaysia](#)
- Seksyen 13. [Setiausaha](#)
- Seksyen 14. [Tatacara perjalanan Mesyuarat Jawatankuasa Fatwa](#)
- Seksyen 15. [Minit](#)
- Seksyen 16. [Tempoh perlantikan dan lantikan semula](#)
- Seksyen 17. [Saraan](#)
- Seksyen 18. [Penamatan, pemberhentian atau pembatalan](#)
- Seksyen 19. [Kuasa Jawatankuasa Fatwa untuk mengeluarkan fatwa](#)

- Seksyen 20. [Korum](#)
- Seksyen 21. [Tatacara mengeluarkan fatwa](#)
- Seksyen 22. [Fatwa adalah mengikat](#)
- Seksyen 23. [Pindaan atau pembatalan fatwa](#)
- Seksyen 24. [Fatwa yang ada hubungan dengan kepentingan nasional](#)
- Seksyen 25. [Meminta pendapat daripada Jawatankuasa Fatwa](#)
- Seksyen 26. [Qaul muktamad hendaklah diikuti](#)

BAHAGIAN IV – AM

- Seksyen 27. [Kuasa membuat kaedah](#)
- Seksyen 28. [Kuasa melantik Jawatankuasa Kecil](#)
- Seksyen 29. [Kecualian dan peralihan](#)

Seksyen 1. Tajuk ringkas dan permulaan kuat kuasa

- (1) Enakmen ini bolehlah dinamakan Enakmen Mufti dan Fatwa (Kedah Darul Aman) 2008.
- (2) Enakmen ini hendaklah berkuat kuasa pada tarikh yang ditetapkan oleh Kebawah Duli Yang Maha Mulia Sultan melalui pemberitahuan dalam *Warta*.

Seksyen 2. Tafsiran

- (1) Dalam Enakmen ini, melainkan jika konteksnya menghendaki makna yang lain—

“Ahli Jawatankuasa Fatwa” ertinya ahli-ahli yang dilantik di bawah seksyen 11;

“Enakmen terdahulu” ertinya Enakmen Pentadbiran Agama Islam Negeri Kedah 1962 [Enakmen No. 9 Tahun 1962];

“fatwa” ertinya fatwa yang dikeluarkan di bawah seksyen 8 atau 19;

“Hukum Syarak” ertinya Hukum Syarak mengikut Mazhab Syafie atau mengikut mana-mana satu Mazhab Hanafi, Maliki atau Hambali;

“Jabatan” ertinya Jabatan Mufti Negeri Kedah Darul Aman;

“Jawatankuasa Fatwa” ertinya Jawatankuasa Fatwa yang ditubuhkan di bawah seksyen 10;

“Majlis” ertinya Majlis Agama Islam Negeri Kedah yang ditubuhkan di bawah Undang-Undang Pentadbiran Agama Islam Tahun 1962 [*Enakmen No. 9 Tahun 1962*];

“Mufti” ertinya Mufti yang dilantik oleh Kebawah Duli Yang Maha Mulia Sultan di bawah seksyen 5;

“nas” ertinya dalil atau hujah yang dikemukakan bagi menyokong sesuatu hukum yang diputuskan;

“Negeri” ertinya Negeri Kedah Darul Aman;

“Pegawai Penyelidik” ertinya Pegawai Penyelidik dan Penolong Pegawai Penyelidik Jabatan Mufti Negeri Kedah Darul Aman;

“Pengerusi” ertinya Pengerusi Jawatankuasa Fatwa;

“qaul muktamad” ertinya pegangan yang kukuh atau yang kuat dalam satu-satu mazhab;

“saraan” ertinya gaji pokok, elaun-elaun, imbuhan, honorarium, pengangkutan percuma atau bersubsidi dan keistimewaan lain yang dapat dinilai dengan wang;

“Setiausaha” ertinya Setiausaha Jawatankuasa Fatwa yang dilantik di bawah seksyen 13;

“Timbalan Mufti” ertinya Timbalan Mufti yang dilantik di bawah seksyen 5.

(2) Semua perkataan dan ungkapan yang digunakan dalam Enakmen ini dan tidak ditakrifkan dalam Enakmen ini tetapi ditakrifkan dalam Akta Tafsiran 1948 dan 1967 [Akta 388] hendaklah mempunyai masing-masing erti yang diberikan kepadanya dalam Akta itu setakat yang erti itu tidak bercanggah dengan Hukum Syarak.

(3) Bagi mengelakkan keraguan tentang identiti atau pentafsiran perkataan dan ungkapan yang digunakan dalam Enakmen ini yang disenaraikan dalam Jadual Pertama, rujukan bolehlah dibuat kepada tulisan Arab bagi perkataan dan ungkapan itu yang ditunjukkan bersempena dengannya dalam Jadual itu.

Seksyen 3. Memelihara hak Kebawah Duli Yang Maha Mulia Sultan

Kecuali sebagaimana yang diperuntukkan dengan nyata dalam Enakmen ini, tiada apa-apa jua yang terkandung dalam Enakmen ini boleh mengurangkan atau menyentuh hak-hak dan kuasa-kuasa Kebawah Duli Yang Maha Mulia Sultan sebagai Ketua Agama Islam di dalam

Negeri Kedah Darul Aman sebagaimana yang ditetapkan dan dinyatakan dalam Undang-Undang Tubuh Kerajaan Negeri Kedah Darul Aman [P.U. 32/59].

BAHAGIAN II - MUFTI

Seksyen 4. Mufti

Mufti yang dilantik di bawah seksyen 5 Enakmen ini hendaklah menjadi pentadbir Jabatan Mufti Negeri Kedah Darul Aman.

Seksyen 5. Perlantikan Mufti dan Timbalan Mufti

(1) Kebawah Duli Yang Maha Mulia Sultan atas nasihat Majlis berkuasa melantik mana-mana orang yang layak dan sesuai menjadi Mufti dan Timbalan Mufti bagi Negeri Kedah Darul Aman.

(2) Perlantikan Mufti dan Timbalan Mufti hendaklah disiarkan dalam *Warta*.

(3) Apabila Enakmen ini mula berkuat kuasa, mana-mana orang yang sebaik sahaja sebelum permulaan kuat kuasa adalah Mufti dan Timbalan Mufti bagi Negeri Kedah Darul Aman yang dilantik di bawah Enakmen terdahulu hendaklah disifatkan telah dilantik di bawah seksyen ini sebagai Mufti dan Timbalan Mufti bagi Negeri Kedah Darul Aman dan hendaklah terus memegang jawatan itu.

Seksyen 6. Penamatan dan pembatalan Mufti dan Timbalan Mufti

(1) Perlantikan seseorang Mufti dan Timbalan Mufti bolehlah ditamatkan atau dibatalkan pada bila-bila masa oleh Kebawah Duli Yang Maha Mulia Sultan.

(2) Perlantikan Mufti dan Timbalan Mufti hendaklah tamat—

(a) apabila dia meninggal dunia; atau

(b) jika dia, dengan surat yang dialamatkan kepada Kebawah Duli Yang Maha Mulia Sultan, melalui Mufti jika dia Timbalan Mufti, meletakkan jawatannya.

(3) Kebawah Duli Yang Maha Mulia Sultan, boleh membatalkan pelantikan Mufti atau Timbalan Mufti jika—

- (a) kelakuannya, sama ada yang berkaitan dengan tugas-tugasnya atau selainnya, adalah kelakuan yang memburukkan nama jawatannya;
- (b) dia telah menjadi tidak berupaya untuk menjalankan tugastugasnya dengan sempurna;
- (c) dia telah bertindak bertentangan dengan kepentingan Negeri; atau
- (d) dia diisytiharkan muflis.

Seksyen 7. Fungsi Mufti

(1) Mufti hendaklah membantu dan menasihati Kebawah Duli Yang Maha Mulia Sultan berkenaan dengan semua perkara Hukum Syarak dan dalam semua perkara sedemikian hendaklah menjadi pihak berkuasa utama di Negeri Kedah Darul Aman selepas Kebawah Duli Yang Maha Mulia Sultan, kecuali jika diperuntukkan selainnya dalam Enakmen ini.

(2) Mufti hendaklah bertanggungjawab terus kepada Kebawah Duli Yang Maha Mulia Sultan dan Baginda bolehlah, dari masa ke semasa memberi perintah sama ada secara am atau khas yang Baginda fikirkan perlu atau bermanfaat, iaitu perintah yang tidak berlawanan dengan peruntukan Enakmen ini, dan adalah menjadi kewajipan Mufti mematuhi dan melaksanakan perintah itu.

Seksyen 8. Kuasa Mufti

(1) Mufti hendaklah berkuasa mengeluarkan apa-apa fatwa.

(2) Walau apapun peruntukan Enakmen ini Mufti boleh, sekiranya difikirkan perlu, berbincang dengan Jawatankuasa Fatwa sebelum mengeluarkan apa-apa fatwa di bawah seksyen ini.

Seksyen 9. Permohonan izin jika Mufti berada di luar Malaysia

Jika Mufti menjangka dia akan berada di luar Malaysia selama lebih daripada 14 hari atau hendak bercuti dia hendaklah memohon perkenan daripada Kebawah Duli Yang Maha Mulia Sultan dan Kebawah Duli Yang Maha Mulia Sultan boleh memberikan apa-apa arahan sebagaimana yang difikirkannya patut.

BAHAGIAN III - JAWATANKUASA FATWA

Seksyen 10. Jawatankuasa Fatwa

Maka hendaklah ditubuhkan suatu jawatankuasa yang dinamakan Jawatankuasa Fatwa yang bertanggungjawab memberi nasihat kepada Mufti di atas apa-apa persoalan yang belum muktamad berhubung Hukum Syarak.

Seksyen 11. Keahlian Jawatankuasa Fatwa

(1) Jawatankuasa Fatwa hendaklah terdiri daripada ahli yang berikut—

- (a) Mufti sebagai Pengerusi,
- (b) Timbalan Mufti sebagai ahli, dan
- (c) Tiga orang anggota Majlis, dan tidak kurang daripada dua dan tidak lebih daripada enam orang lain, yang layak dan sesuai dilantik oleh Kebawah Duli Yang Maha Mulia Sultan atas nasihat Mufti.

(2) Perlantikan ahli Jawatankuasa Fatwa di bawah perenggan 11(1)(c) hendaklah disiarkan dalam *Warta*.

Seksyen 12. Notis jika Ahli Jawatankuasa Fatwa berada di luar Malaysia

Jika mana-mana ahli Jawatankuasa Fatwa menjangka dia akan berada di luar Malaysia selama lebih daripada 14 hari, dia hendaklah memberi notis bertulis kepada Mufti.

Seksyen 13. Setiausaha

(1) Mufti boleh melantik seorang pegawai dari Jabatan sebagai Setiausaha.

(2) Tertakluk kepada apa-apa arahan yang diberikan oleh Pengerusi kepadanya, Setiausaha hendaklah bertanggungjawab ke atas semua surat menyurat dan dokumen Jawatankuasa Fatwa, dan hendaklah dalam apa-apa hal lain menjalankan tugas yang dikenakan ke atasnya oleh Enakmen ini atau yang diberikan kepadanya oleh Pengerusi.

(3) Setiausaha berhak untuk menghadiri semua mesyuarat Jawatankuasa Fatwa dan mengambil bahagian tetapi tidak berhak mengundi.

Seksyen 14. Tatacara perjalanan mesyuarat Jawatankuasa Fatwa

- (1) Mufti hendaklah menjadi Pengerusi di dalam semua mesyuarat Jawatankuasa Fatwa.
- (2) Jika Mufti tidak hadir dengan sebab kesihatan atau sebab-sebab lain maka Timbalan Mufti bolehlah mempengerusikan mesyuarat Jawatankuasa Fatwa.
- (3) Semua mesyuarat Jawatankuasa Fatwa hendaklah dipanggil oleh Setiausaha.
- (4) Pengerusi boleh pada bila-bila masa mengarahkan Setiausaha memanggil mesyuarat.
- (5) Jawatankuasa boleh, tertakluk kepada Enakmen ini, memutuskan segala persoalan berhubung dengan tatacara dan amalannya.

Seksyen 15. Minit

- (1) Setiausaha hendaklah menyimpan semua minit mesyuarat Jawatankuasa Fatwa.
- (2) Pada tiap-tiap mesyuarat, minit mesyuarat yang lalu hendaklah dibaca dan disahkan, tertakluk kepada apa-apa pindaan jika perlu.
- (3) Minit hendaklah dicatatkan dan hendaklah mengandungi rekod penuh bagi tiap-tiap ketetapan yang dibuat oleh Jawatankuasa Fatwa.
- (4) Tiada keputusan yang dibuat dalam mana-mana mesyuarat Jawatankuasa Fatwa boleh diambil tindakan sehingga minit mesyuarat itu disahkan.

Seksyen 16. Tempoh Perlantikan dan lantikan semula

- (1) Tempoh perlantikan ahli Jawatankuasa Fatwa yang dilantik di bawah perenggan 11(1)(c) adalah selama dua tahun. Tempoh bagi perlantikan mana-mana ahli Jawatankuasa Fatwa yang baru bagi tujuan mengisi kekosongan hendaklah tamat pada tempoh masa yang sama dengan ahli Jawatankuasa Fatwa yang lain.
- (2) Mana-mana ahli yang tempoh lantikannya telah tamat boleh dilantik semula oleh Kebawah Duli Yang Maha Mulia Sultan atas nasihat Mufti.
- (3) Mana-mana orang yang menjadi Mufti, Timbalan Mufti dan ahli Jawatankuasa Fatwa sebaik sahaja sebelum berkuat kuasa Enakmen ini hendaklah disifatkan sebagai telah dinamakan atau dilantik menjadi Mufti, Timbalan Mufti dan ahli Jawatankuasa Fatwa

tersebut dan hendaklah bagi maksud Enakmen ini, Mufti, Timbalan Mufti dan ahli Jawatankuasa Fatwa menjadi ahli Jawatankuasa itu sehingga tempoh perantikannya tamat.

Seksyen 17. Saraan

Mufti boleh, dengan perkenan Kebawah Duli Yang Maha Mulia Sultan menetapkan apa-apa saraan bagi ahli Jawatankuasa Fatwa.

Seksyen 18. Penamatan, pemberhentian atau pembatalan

(1) Keahlian seseorang ahli Jawatankuasa Fatwa yang dilantik di bawah perenggan 11(1)(c) bolehlah ditamatkan atau dibatalkan pada bila-bila masa oleh Kebawah Duli Yang Maha Mulia Sultan atas syor Mufti atas sebab-sebab tertentu yang melayakkannya diberhentikan keahliannya.

(2) Mana-mana Ahli Jawatankuasa Fatwa yang dilantik di bawah perenggan 11(1)(c) bolehlah, dengan surat yang dialamatkan kepada Kebawah Duli Yang Maha Mulia Sultan, memohon perkenan melalui Mufti, untuk melepaskan keahliannya.

(3) Keahlian mana-mana ahli Jawatankuasa Fatwa yang tidak hadir ke mesyuarat sebanyak tiga kali berturut-turut tanpa alasan yang munasabah bolehlah ditamatkan.

(4) Penamatan, pemberhentian atau pembatalan keahlian mana-mana Ahli Jawatankuasa Fatwa hendaklah disiarkan dalam *Warta*.

Seksyen 19. Kuasa Jawatankuasa Fatwa untuk mengeluarkan Fatwa

(1) Tertakluk kepada seksyen 21 Jawatankuasa Fatwa hendaklah—

(a) atas titah perintah Kebawah Duli Yang Maha Mulia Sultan, atau

(b) atas kehendaknya sendiri, atau

(c) atas permintaan oleh mana-mana orang melalui surat atau apa-apa cara yang dialamatkan kepada Mufti dan tertakluk kepada subseksyen (2),

mengeluarkan suatu fatwa atas apa-apa persoalan yang belum muktamad atau atas apa-apa isu yang berhubung dengan Hukum Syarak.

(2) Jawatankuasa Fatwa hendaklah menimbangkan permintaan oleh mana-mana orang kecuali pada fikirannya masalah yang dibentangkan itu hanya karut atau dengan apa-apa sebab lain yang munasabah yang tidak patut diberi jawapan.

Seksyen 20. Korum

(1) Pengerusi dan lima orang ahli Jawatankuasa Fatwa yang lain hendaklah membentuk korum.

(2) Tiada urusan, kecuali mengenai penangguhan, boleh dilakukan dalam sesuatu mesyuarat, dan tiada ketetapan atau tindakan Jawatankuasa Fatwa yang dibuat atau dilaksanakan dalam sesuatu mesyuarat adalah sah melainkan, jika sekurang-kurangnya satu pertiga daripada anggota, termasuk orang yang mempengerusikan mesyuarat, hadir dalam mesyuarat itu.

(3) Tertakluk kepada kehendak Enakmen ini, Jawatankuasa Fatwa itu boleh membuat peraturannya sendiri dan membuat apa-apa tatacara di bawahnya.

(4) Ahli Jawatankuasa Fatwa hendaklah disifatkan sebagai pekhidmat awam mengikut Kanun Keseksaan [*Akta 574*].

Seksyen 21. Tatacara mengeluarkan Fatwa

(1) Sebelum mengeluarkan sesuatu fatwa, Mufti boleh menyebabkan satu kajian atau penyelidikan dijalankan oleh Pegawai Penyelidik sebagaimana yang diarahkan olehnya dan satu kertas kerja disediakan.

(2) Mufti boleh memanggil suatu mesyuarat Jawatankuasa Fatwa bagi maksud membincangkan fatwa yang dicadangkan itu.

(3) Apa-apa fatwa yang diputuskan oleh Mufti atau Jawatankuasa Fatwa yang melibatkan kepentingan awam hendaklah disiarkan dalam *Warta*.

(4) Mufti hendaklah mendapat perkenan Kebawah Duli Yang Maha Mulia Sultan sebelum apa-apa fatwa disiarkan dalam *Warta*.

(5) Sesuatu fatwa yang disiarkan hendaklah dalam bahasa kebangsaan, dalam tulisan Rumi, dan boleh mengandungi teks fatwa itu dalam tulisan Jawi.

(6) Apa-apa pernyataan yang diputuskan oleh Mufti atau Jawatankuasa Fatwa di bawah Enakmen ini adalah fatwa.

Seksyen 22. Fatwa adalah mengikat

(1) Apa-apa fatwa yang disiarkan dalam Warta hendaklah mengikat tiap-tiap orang Islam yang berada di Negeri Kedah Darul Aman sebagai ajaran agamanya dan hendaklah menjadi kewajipan di sisi Agama Islam untuk mematuhi dan berpegang dengan fatwa itu, melainkan jika dia dibenarkan oleh Hukum Syarak untuk tidak mengikut fatwa itu dalam perkara-perkara amalan, kepercayaan atau pendapat.

(2) Sesuatu fatwa bolehlah diterima oleh semua Mahkamah Syariah di dalam Negeri Kedah Darul Aman sebagai autoriti tentang semua perkara yang dinyatakan dalamnya.

Seksyen 23. Pindaan atau pembatalan Fatwa

(1) Jawatankuasa Fatwa boleh meminda atau membatalkan mana-mana fatwa yang telah disiarkan dalam Warta di bawah Enakmen ini, atau di bawah mana-mana Enakmen terdahulu.

(2) Peruntukan seksyen 21 adalah terpakai bagi sesuatu pindaan atau pembatalan mana-mana fatwa.

(3) Sesuatu pindaan atau pembatalan sesuatu fatwa yang disiarkan dalam *Warta* hendaklah disertakan dengan pernyataan bahawa fatwa itu dibuat di bawah seksyen 23.

Seksyen 24. Fatwa yang ada hubungan dengan kepentingan nasional

(1) Walau apapun kuasa Jawatankuasa Fatwa di bawah seksyen 19, apabila Jawatankuasa Fatwa mendapati bahawa suatu fatwa yang dicadangkan dibuat adalah berkaitan dengan perkara-perkara yang menyentuh kepentingan nasional, Jawatankuasa Fatwa hendaklah menangguhkan perbincangannya tentang fatwa yang dicadangkan itu dan Mufti hendaklah menyembah maklum perkara itu kepada Kebawah Duli Yang Maha Mulia Sultan.

(2) Walau apapun peruntukan subseksyen (1), suatu fatwa adalah dianggap berkaitan dengan perkara-perkara yang menyentuh kepentingan nasional jika persoalan itu ada hubungan dengan apa-apa perkara, dasar, program atau aktiviti yang secara langsung menyentuh kepentingan Kerajaan Persekutuan, Kerajaan Negeri atau mana-mana jabatan atau agensinya.

(3) Jika Kebawah Duli Yang Maha Mulia Sultan memberikan perkenannya di bawah subseksyen (1), Mufti hendaklah, sebelum fatwa itu dirujuk kepada Jawatankuasa Fatwa, memaklumkan kepada Kerajaan Negeri Kedah Darul Aman tentang rujukan itu.

(4) Sesuatu fatwa yang disiarkan dalam Warta hendaklah disertakan dengan pernyataan bahawa fatwa itu dibuat di bawah seksyen ini.

Seksyen 25. Meminta pendapat daripada Jawatankuasa Fatwa

(1) Jika dalam mana-mana Mahkamah Sivil, apa-apa persoalan Hukum Syarak perlu diputuskan, Mahkamah itu boleh meminta pendapat Jawatankuasa Fatwa tentang persoalan itu, dan Mufti boleh memperakukan pendapat Jawatankuasa Fatwa itu kepada Mahkamah yang membuat permintaan pendapat itu.

(2) Walau apapun undang-undang bertulis yang berlawanan, Mufti tidaklah boleh disaman untuk memberi pendapat atau keterangan mengenai Hukum Syarak di dalam mana-mana Mahkamah Sivil dan Mahkamah Syariah.

Seksyen 26. Qaul muktamad hendaklah diikuti

(1) Dalam mempertimbangkan apa-apa fatwa di bawah seksyen 21 atau memperakukan apa-apa pendapat di bawah seksyen 25 Jawatankuasa Fatwa hendaklah, pada lazimnya mengikut qaul muktamad Mazhab Syafie berlandaskan Al-Quran, Hadis, Ijma' Ulama dan Qiyas.

(2) Jika Jawatankuasa Fatwa berpendapat bahawa dengan mengikut qaul muktamad Mazhab Syafie suatu keadaan yang berlawanan dengan kepentingan awam akan terhasil, Jawatankuasa Fatwa bolehlah mengikut qaul muktamad Mazhab Hanafi, Maliki atau Hambali setelah mendapat perkenan Kebawah Duli Yang Maha Mulia Sultan.

(3) Jika Jawatankuasa Fatwa berpendapat bahawa tiada satu pun qaul muktamad daripada empat mazhab itu boleh diikuti tanpa membawa kepada keadaan yang berlawanan dengan kepentingan awam, maka fatwa itu bolehlah diputuskan mengikut hematnya sendiri tanpa terikat dengan qaul muktamad daripada mana-mana mazhab yang empat itu.

BAHAGIAN IV – AM

Seksyen 27. Kuasa membuat kaedah

Mufti boleh dengan perkenan Kebawah Duli Yang Maha Mulia Sultan membuat apa-apa peraturan yang suai manfaat atau perlu bagi melaksanakan maksud Enakmen ini.

Seksyen 28. Kuasa melantik Jawatankuasa Kecil

Mufti boleh melantik beberapa jawatankuasa kecil bagi membantunya dalam menjalankan tugas-tugas Jabatan dengan lebih berkesan.

Seksyen 29. Kecualian dan peralihan

Semua tindakan, kaedah, fatwa, perisytiharan, perintah, pemberitahuan, surat kebenaran, pengesahan arah qiblat dan apa-apa perlantikan yang dikeluarkan atau dibuat di bawah atau menurut kuasa mana-mana Enakmen hendaklah pada permulaan kuat kuasa Enakmen ini terus berkuat kuasa setakat yang tidak bertentangan dengan Enakmen ini, sehingga ia dibatalkan atau digantikan oleh kaedah, fatwa, perisytiharan, perintah, pemberitahuan, surat kebenaran, pengesahan arah qiblat dan apa-apa perlantikan yang dikeluarkan atau dibuat di bawah Enakmen ini.

Jadual

(Subseksyen 2(3))

BENTUK SKRIP BAHASA ARAB BAGI PERKATAAN DAN UNGKAPAN TERTENTU

<i>Al-Quran</i>	—	القرآن
<i>Fatwa</i>	—	فتوى
<i>Hukum Syarak</i>	—	حكوم شرع
<i>Hadis</i>	—	حديث
<i>Ijma' Ulama</i>	—	إجماع علماء
<i>Ijtihad</i>	—	إجتهد
<i>Mazhab</i>	—	مذهب
<i>Mahkamah Syariah</i>	—	محكمة شرعية
<i>Nas</i>	—	نص
<i>Qaul muktamad</i>	—	قول معتمد
<i>Qiyas</i>	—	قياس

Diluluskan di dalam Dewan Undangan Negeri pada 18 November 2007 bersamaan dengan 8 Zulkaedah 1428.

ABD. RASHID BIN HAJI OTHMAN

Setiausaha Dewan Undangan Negeri

Kedah Darul Aman

[PSU(K) 3784/1389]

SENARAI PINDAAN

<i>Undang-undang yang meminda</i>	<i>Tajuk ringkas</i>	<i>Tarikh mula berkuatkuasa</i>
K.P.U. 30/2008	Pembetulan	Seperti En. 6/2008 / En. 10 - 1 April 2008